

Conflicto tocante e Prins di Carnaval di Aruba Antonio Bulos

**Prins nobo (pa lot) Jose Rafael Bislick
(di Commandeursbaai Club)**

ORANJESTAD — Pa motibu di e conflicto, cual a origina tocante e eleccion di diasabra anochi u.p. di Antonio Bulos como Prins Carnaval 1960 si e tabata legal of no, Centraal Carnaval Comite Aruba a duna siguiente comunicado:

„Dia 15 di februari e Centraal Carnavals Comite Aruba a reuni den Lago Heights Club pa trece claridad den e rumornan sensacional cu ta corre tocante e candidato di Watapana Club, Antonio Bulos, kende pa un jurado forma pa C.C.C.-Aruba (den cual sin embargo no tabatin ningun miembro dje comite) diasabra a worde elihí como Prins Carnaval 1960, pero kende door dje critica cu a worde hasi riba su persona a disidi di entrega trobe e puesto recién obteni. A la vez e la gradici e publico pa e simpatia y e cooperacion cu nan a dunele di manera cu e la keda elihí como Prins Carnaval. Pa motibu dje rumornan, cu ta bisa cu ni siquiera e tabata miembro mas di Watapana Club, senyor Bulos a mustra C.C.C.-Aruba su lidmaatschapsbewijs cu e tin di 1957.

En bista dje pasadanan aki e comite anto a disidi di elihí un Prins Carnaval nobo dje otro candidatos di Diasabra anochi (tabata e candidatos di Commandeursbaai club, La Fama y Aruba Jrs. Red.) na cual ocasion e representantenan dje tres clubnan mencioná tabata presente. Lot mester a disidi y a worde saca door di senyor Antonio Bulos, y e Prins Carnaval nobo pa 1960 a hira awor senyor Jose Rafael Bislick, kende a elihí Jose Serapio Tromp pa su Pancho. E senyor nan aki ta representa Commandeursbaai Club.

Den e mesun comunicado C.C.C.-Aruba ta informa tambe, cu e secretario di e comite, senyor Athyl Toppenberg, kende a la vez ta president di Club Watapana, en bista di e critica cu tabatin en coneccion cu eleccion di e Prins Carnaval, y cu a worde hasi na su persona, sin razon, tambe a tuma su retiro como miembro di e central comite. E secretario den futuro lo ser atende pa senyor Capijs Lacle.

Nota di redaccion:

Di parti di e comite nan a informa nos, cu segun informadornan di circunonan di clubnan, kende tambe a presenta nan candidatos pa Prins Carnaval, cu senyor Bulos diasabra anochi numa a worde presenta como prins di Carnaval pa Club Watapana, na cual ocasion un miembro di directiva na e lugar di eleccion a yena e formulario necesario y a firma e formulario. Den esaki no tin nada particular, como cu tabata permiti pa presenta candidatos e anochi ei ainda. Segun e informadornan e candidatura no tabata valido, como cu senyor Bulos basta tempo caba no ta miembro mas di e club y cu ademas e otro miembronan di directiva di Watapana Club no tabata na altura cu senyor Bulos a worde presenta como candidato. E afirmacion aki sin embargo a worde impugna pa e miembro di directiva cu a firma e formulario pa senyor Bulos. Manera cu e comunicado a mustra, senyor Bulos a presenta un lidmaatschapkaart di Watapana Club di 1957 na e comite. E prins Carnaval cu recientemente a worde elihí, y cu no por a aprecia e cierto dificultadnan grandi rond di su persona, a gradici mes ora pa e honor.